



**SEMBAH ALU-ALUAN**

**YANG BERHORMAT  
DATO SERI SETIA AWANG HAJI NAZMI BIN HAJI MOHAMAD  
MENTERI KEBUDAYAAN, BELIA DAN SUKAN**

**SAMBUTAN HARI BELIA KEBANGSAAN KALI KE-18, TAHUN 2023**

**HARI SELASA  
14 MUHARRAM 1445  
BERSAMAAN  
01 OGOS 2023**

**DI DEWAN PLENARY  
PUSAT PERSIDANGAN ANTARABANGSA,  
BERAKAS**

Bismillahirrahmanirrahim.

Alhamdulillah Rabbil Alamin Wassalatu Wassalamu 'Ala Asyrafil Anbiyaie Wal Mursalin Sayyidina Muhammadin Wa 'Ala Alihi Wasahbihi Ajma'in.

Assalamualaikum warahmatullahi wabarakatuh.

Alhamdulillah, segala puji dan syukur ke hadrat Allah Subhaanahu Wa Ta'ala, selawat serta salam ke atas junjungan besar kita Nabi Muhammad S.A.W, kaum keluarga, para sahabat serta pengikut Baginda yang taat lagi setia hingga ke akhir zaman.

Mengadap kehadiran Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam.

Ampun Beribu-ribu ampun,

Dengan penuh hormat dan takzim, hamba Kebawah Duli Tuan Patik dan bagi pihak Ahli-Ahli Jawatankuasa Sambutan Hari Belia Kebangsaan Ke-18, Tahun 2023, serta para belia Negara Brunei Darussalam, merafakkan sembah setinggi-tinggi menjunjung kasih atas keberangkatan Kebawah Duli Tuan Patik ke Majlis Sambutan Hari Belia Kebangsaan Ke-18 pada pagi ini dan seterusnya berkenan

mengurniakan titah, menyempurnakan pengurniaan Anugerah-Anugerah dan berangkat bercemar duli ke Pameran Hari Belia.

Keberangkatan Kebawah Duli Tuan Patik ke Sambutan ini mencerminkan keprihatinan dan pemedulian Kebawah Duli Tuan Patik terhadap apa jua isu dan perkembangan belia. Keberangkatan ini setentunya akan memberikan makna yang tersendiri dan akan menjadi ristaan kepada para belia di Negara Brunei Darussalam, di samping menyuntik semangat kepada para belia untuk terus giat menggandakan usaha dalam menyumbangkan idea dan tenaga bagi sama-sama mencapai matlamat utama Dasar Belia Negara dan Strategi yakni DBNS 2020-2035 serta Wawasan Negara 2035.

Ampun Beribu-ribu Ampun,

Hamba Kebawah Duli Tuan Patik menyembahkan bahawa tema Sambutan Hari Belia Kebangsaan pada tahun ini masih mengekalkan tema pada tahun-tahun lepas iaitu **“Belia Siaga Masa Depan”**. Tema ini dilihat masih relevan dan selaras dengan hasrat murni Kebawah Duli Tuan Patik yang ingin melihat belia Brunei siap siaga dengan pelbagai ilmu dan kemahiran, pemikiran yang progresif serta jati diri yang mantap untuk menghadapi apa jua cabaran di masa hadapan.

Belia sebagai generasi harapan bangsa dan negara bakal memikul tanggungjawab meneraju negara masa kini dan di masa hadapan. Oleh itu, melahirkan belia yang cemerlang dan siaga masa depan adalah impian negara. Belia perlu mampu memanfaatkan peluang dari transformasi teknologi dan ekonomi bagi memajukan

diri, memartabatkan bangsa dan seterusnya melonjakkan pembangunan negara ke tahap yang lebih tinggi dan mampan.

Dalam membangun potensi belia, tidak dinafikan pendekatan senegara adalah sangat signifikan bagi memastikan apa juga perancangan dan program yang dilaksanakan adalah efektif dan berimpak tinggi serta menyumbang kepada pencapaian visi serta matlamat DBNS 2020-2035

Hamba Kebawah Duli Tuan Patik sukacita menyembahkan bahawa pelaksanaan Pelan Tindakan DBNS 2020-2024 dan juga Rancangan Kerja Belia ASEAN 2021-2025 serta Rancangan Kerja Belia ASEAN *Plus Three* yang melibatkan 10 Negara ASEAN dan rakan dialog pada masa ini adalah berjalan dengan lancar.

Pelan – pelan tindakan ini akan sentiasa dikemaskini untuk mencapai Prestasi Petunjuk Utama dan matlamat DBNS 2020 – 2035 dengan mengambilkira persekitaran semasa.

Dalam sumbangan belia ke arah Matlamat Pembangunan Mampan atau *Sustainable Development Goals* yakni *SDG*, Dialog Belia *SDG* telah dilaksanakan bersama pihak – pihak berkepentingan dengan sokongan *United Nations Economic and Social Commission for Asia and the Pacific [UN ESCAP]* pada 15 hingga 17 Mei 2023. Di akhir dialog tersebut, *SDG Youth Statement* telah dihasilkan dan dijadikan sebahagian daripada Laporan *Voluntary National Review (VNR)* yang telah disampaikan di *High-Level Political Forum on Sustainable Development* di New York baru-baru ini. Dalam memastikan kesinambungan dialog tersebut, pihak Bank Islam

Brunei Darussalam telah mengumumkan *BIBD Sustainability Youth Leaders Award* sebagai dorongan kepada belia untuk menghasilkan projek yang memberi impak kepada SDG.

Dari aspek kesukarelawanan, Aplikasi Mengalinga yang dilancarkan pada tahun 2021, telah merekodkan lebih dari 340 pelaksanaan Program Kesukarelawanan di seluruh Negara dan setakat ini sebanyak lebih 2,700 individu dan 160 buah organisasi berdaftar di dalam sistem tersebut.

Bermula 1 Ogos ini, perisian Aplikasi Mengalinga akan dinaiktaraf dengan menambah ciri-ciri baharu yang secara tidak langsung akan dapat menarik lebih ramai golongan belia dan masyarakat untuk melaksanakan aktiviti kesukarelawanan dan terus menyumbang khidmat kepada masyarakat.

Ampun Beribu-ribu Ampun,

Konsep Sambutan Hari Belia Kebangsaan pada tahun ini adalah tertumpu kepada 'Aspirasi Belia' yang akan menonjolkan perpaduan yang harmoni di antara golongan belia selaku pemimpin masa depan negara. Konsep ini memfokuskan kepada tiga bidang utama iaitu: pertama *Sumbangan Belia*; kedua *Kemahiran dan ilmu* dan ketiga *Warisan dan Budaya*.

Manakala Pameran Hari Belia tahun ini juga turut melibatkan penyertaan sejumlah 35 organisasi yang terdiri dari pergerakan belia dan rakan-rakan strategik yang akan

mempamerkan projek masing-masing yang mendukung ke arah pembangunan belia di Negara ini.

Sambutan Hari Belia Kebangsaan kali ini turut diserikan dengan pengendalian Festival Hari Belia. Festival ini diadakan bagi memberi peluang kepada persatuan-persatuan belia dan sukan, kumpulan-kumpulan dan usahawan belia untuk menunjukkan kreativiti serta kebolehan para belia dalam menganjurkan acara-acara sampingan sempena Hari Belia Kebangsaan pada tahun ini.

Ampun Beribu-ribu Ampun,

Alhamdulillah, pada tahun ini, sebanyak empat kategori anugerah akan diberikan iaitu Anugerah Belia Cemerlang; Anugerah Belia Berkhidmat; Anugerah Pemimpin Muda Belia; dan Anugerah Projek Cemerlang untuk Belia. Di samping itu, pada tahun ini juga, satu Anugerah Pengiktirafan Khas (*Special Mention*) akan diberikan bagi mengiktiraf belia yang memberikan perkhidmatan dan memperjuangkan serta memartabatkan belia khususnya belia Orang Kelainan Upaya di Negara ini.

Syabas dan tahniah diucapkan kepada semua penerima anugerah dan hamba Kebawah Duli Tuan Patik penuh berharap agar pengurniaan anugerah ini akan dapat menjadi sumber inspirasi kepada belia-belia yang lainnya untuk melibatkan diri sama ada secara persendirian atau berpersatuan dan seterusnya terus aktif memberikan sumbangan secara berterusan demi pembangunan belia dan masyarakat di negara ini.

Akhirnya, hamba Kebawah Duli Tuan Patik dengan penuh hormat dan takzim sekali lagi menyembahkan setinggi-tinggi menjunjung kasih atas keberangkatan Kebawah Duli Tuan Patik ke Majlis pada pagi ini. Hamba Kebawah Duli Tuan Patik turut menjunjung perkenan bagi menyembahkan sembah ucapan menjunjung kasih atas keberangkatan Paduka-Paduka Anaknda dan Adinda Kebawah Duli Tuan Patik, iaitu:

- i. Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah, Menteri Kanan di Jabatan Perdana Menteri;
- ii. Duli Yang Teramat Mulia Paduka Seri Pengiran Muda ‘Abdul Malik;
- iii. Duli Yang Teramat Mulia Paduka Seri Pengiran Perdana Wazir Sahibul Himmah Wal-Waqar Pengiran Muda Mohamed Bolkiah;
- iv. Duli Yang Teramat Mulia Paduka Seri Pengiran Digadong Sahibul Mal Pengiran Muda Haji Jefri Bolkiah;

Menjunjung kasih atas keberangkatan Yang Amat Mulia Pengiran – pengiran Cheteria.

Ucapan terima kasih juga atas kehadiran:

- i. Yang Berhormat Menteri-Menteri Kabinet;
- ii. Yang Mulia Timbalan-Timbalan Menteri;
- iii. Dif Dif Kehormat
- iv. Para Hadirin dan Hadirat khususnya para belia yang hadir di Majlis pada pagi ini.

Sebelum hamba Kebawah Duli Tuan Patik menjunjung anugeraha berundur diri, hamba Kebawah Duli Tuan Patik dengan penuh hormat serta takzim menjunjung ampun beribu-ribu ampun Kehadapan Majlis Kebawah Duli Tuan Patik jika terdapat kata-kata yang kurang manis atau suruk langkah yang tidak disenghajakan di dalam sembah alu-aluan ini dan dalam pengendalian Sambutan Hari Belia Kebangsaan Ke-18, Tahun 2023 pada hari ini.

Sekian, Wabillahi Taufik Walhidayah

Wassalamu'alaikum Warahmatullahi Wabarakatuh.

Hamba Kebawah Duli Tuan Patik menjunjung anugeraha.